

**Suplica pa
ciudadanonan
no laga auto
habri ora bo
baha haci
compras**

Tabatin total di 36 detencion...

**Parada Grandi a wordo dedica na
Cuerpo Policial di Aruba**



ORANJESTAD (AAN): Aruba su Grand Parade di Carnaval 71 a bay relativamente mihor compara cu aña pasa, y esey segun punto di bista di Cuerpo Policial. Vocero Liliana Rasmijn di Cuerpo Policial, a indica cu en total a detene 36 persona. Detencion tabata entre otro bringamento, no sigui ordo di polis, buracheria, droga, y hende canando cu arma blanco.

Ministro demisionario Ursell Arends

**E prome 20 permiso
nobo pa Taxi a
wordo firma**

**City Inspector contento cu reaccion di
publico pa usa saco di sushi**

Aruba a celebra un Carnaval luhoso y bunita



ORANJESTAD (AAN): Den fin di siman, gruponan di Carnaval na Aruba a uni man pa asina a ofrece pueblo un luhoso Parada Grandi di Carnaval, cu a briya cu creatividad, beyeza, y ambiente pa asina keda demostra cu Carnaval di Aruba si ta Carnaval.

Algun roadpiece a haci e parada haya su toque perfecto cu a wordo admira pa grandi y chikito, y e ambiente musical a pone tur hende move cu e ritmo pegahoso tambe. Pabien na tur participante, tur lider di grupo, y SMAC cu atrobe a crea un bunita showcase di fantasia total di Carnaval di Aruba.



Parlamentario Otmar Oduber di PPA:

Ta haci un yamada na e desaroyador pa cumpli cu rehabilitacion di parti di Baby Beach



ORANJESTAD (AAN)—Parlamentario y Lider di Partido PPA, Otmar Oduber, den entrevista cu DIARIO a referi na e negociacion cu e grupo concerni, cu ta bin e hotel riba e clip na San Nicolas, y a palabra di un inversion cu e desaroyadornan ta bay haci. Oduber a aplica cu Aruba a perde dos tercer parti di e



Beach di Baby Beach, net pariba di Rum Reef, door di e horcan mas of menos 22 aña pasa, y den e negociacion nan a yega na un acuerdo cu e desaroyadornan cu nan lo inverti mas of menos 2 milyon dollar, pa recrea e beach completo. Esaki pa haci e beach mas of menos di 40 pa 50% mas grandi, mas amplio, mas

espacio di loke tin aworaki pero cu ta conforme na loke tabata tin 20-25 aña pasa. Otmar a haci un yamada na e desaroyadornan, pasobra ainda nan ta na tempo, debi cu, lamentablemente, e no ta scucha nada mas riba e parti aki. “Mi sa, pasobra ami mes ta e minister cu a pasa e ley di Marine Park, y cu ta duna cierto protec-



cion na nos lamanan, pero den e tempo ey nos a bisa caba cu no ta un beach nan ta bay crea, sino un beach cu nan ta bay recrea, pues cu tabata existi caba y nan ta bay pone den su forma original, y cu esey tabata mehora of percura pa tin un ampliacion na Baby Beach, na momento cu nan tin e hotel ta bin eyriba”, Odu-

ber a relata. Otmar Oduber ta señala cu hopi hende ta papia cosnan pero nan no sa e esencia di e informacion, y e pregunta aworaki ta na e instancianan, na e desaroyadornan, na gobierno, si den e preparacion cu ta bay habri na Juni, si a percura pa e beach aki ta bay wordo rehabilita, manera cu e tabata anteriormente.

Suplica pa ciudadanonan no laga auto habri ora bo baha haci compras



ORANJESTAD (AAN): E ta un trend nobo cu ta pasando. Hendenan ta birando demasiado dejado, y hendenan cu ta para tras di cortina, ta probecha di esaki.

Ta referi aki na hendenan cu ta baha di auto pa drenta un shap, un tienda, of un supermarket y ta laga nan auto habri, tin biaha hasta cu yabi poni den ignition switch. Simanpasa Diamars tambe,

un dama hoben a baha na Dior Supermarket na Pos Chikito pa haci compras di 3 articulo chikito. El a bay laga e auto cendi pafo. Un persona a yega subi e auto y a move bay. Aunke e yabi no ta den e auto (ta start cu push-button), esey nifica cu ora e persona cu a bay cune a paga e motor, e lo no por start e bek. Tabata trata di un auto sedan tipo Mazda 2, y el a wordo haya despues.

Diadomingo merdia aparentemente algo similar a socede, pero e biaha aki na Paradera. Polis a mobilisa pa un Supermarket unda un cliente a yega bek pafo y descubri cu su auto Toyota a desaparece. Autoridad a papia cu e señora, kende a splica cu el a baha bay haci compras y ora el a sali su Toyota Corolla no tabatey mas. Polis a presenta y a tuma informacion di e señora.



Algun rato despues ta drenta un informacion cu e auto aki lo a ser mira of haya na Papaya. Polis a bay na e area, y berdad a bin topa cu e auto para banda di caminda y cu e yabi na e ignition-switch.

Parse cu e señora lo a laga e auto sin lock dilanti

e Supermarket, y pa colmo den dje e tabatin un yabi di spare. Esaki a haci facil pa e ladron por a start e y bay cu ne. Ta parce cu ta un ladron basta ‘chill’, pasobra ora cu e señora a yega na Papaya pa check e auto, e no sinti falta di nada y por a bay cu e auto.

E prome 20 permiso nobo pa Taxi a wordo firma

ORANJESTAD (AAN): Siman pasa, Ministro demisionario Ursell Arends a firma e prome 20 permisionan nobo pa mas Taxi na Aruba.

Por corda cu desde comienso a bisa cu maneho di permiso di taxi mester ta basa riba oportunidad igual. Na 2023 a cuminsa cu e inventarizacion di



esnan cu den pasado a aplica, y cu a parce di

tin hende cu tin mas cu 20 aña wardando. Cu cambio den maneho a cuminsa trece estructura y transparencia den e proceso.

E lista completo di esnan cu ta den pipeline pa ricibi permiso di taxi, basa riba zaaknummer, ta riba e website di publico. aw den e 'tab' di permiso. DIARIO a compronde

cu e prome 20 nan cu a wordo firma ta basa riba fecha di peticion, pues FIFO (first-in-first-out), kendenan a wordo contacta door di DTP pa presenta cu nan documentonan pa verificacion cualificacion, etc, y den e caso aki e prome 20 nan ta Hulpchauffeur actual cu ta cumpli cu tur rekesito necesario.

Tabatin total di 36 detencion...

Parada Grandi a wordo dedica na Cuerpo Policial di Aruba

ORANJESTAD (AAN): Aruba su Grand Parade di Carnaval 71 a bay relativamente mihor compara cu aña pasa, y esey segun punto di bista di Cuerpo Policial.

Diadomingo pa exactamente 11:00'or di mainta dirigentenan di SMAC conhuntamente cu KPA haci inicio di parada grandi di Oranjestad. Den esaki tambe SMAC a dedica Carnaval 71 na Cuerpo Policial di Aruba.

E biaha aki tabata tin 9 grupo cu mas o menos 3.000 participante.

Cuerpo Policial Aruba a conta cu 220 personal riba pia. Diferente departamento di Cuerpo Policial a traha hunto entre otro Polis Uniforma, ME, Motor Unit, K-9, Mobiel Commando, O.C.C., Flex team, Trafico, planologie,

departamento di recherche, personal administrativo y tambe personal di CEA.

Pa 5:00 pm, e cabez di e parada a yega ex-DOW despues di a pasa riba e ruta di 3,5 kilometer. Pa 7:30 pm, e rabo (e biaha aki como 'Last Lap') a yega su final.

Pa 9:05 pm den Harbour Arena a kima Rey Momo y asina Carnaval 71 a yega su final.

Vocero Liliana Rasmijn di Cuerpo Policial, a indica cu en total a detene 36 persona. Detencion tabata entre otro bringamento, no sigui ordo di polis, buracheria, droga, y hende canando cu arma blanco.

Compara cu e Carnaval 70 di aña pasa, e tempo aya tabatin 41 detencion riba e Parada Grandi.



Ocho chauffeur a keda deteni

Dos chauffeur asina burachi cu nan no por a ni supla

ORANJESTAD (AAN): Mal noticia pa seis chauffeur, cu despues di Parada Grandi di Carnaval 71 na San Nicolas a tuma e decision peor di nan bida, di sinta tras di stuur y purba di bay cas siendo nan ta pata-pata burachi.

Pasobra Unidad Motoriza di Polis a para na diferente punto strategicamente pa asina por haci e control di trafico prome, durante y despues di parada grandi na San Nicolas.

Liliana Rasmijn kende ta vocero di Polis, a confirma

cu nan a detene 8 chauffeur relaciona cu Parada Grandi di San Nicolas.

Lo mas notabel ta cu 6 chauffeur a perde nan rijbewijs inmediatamente, debi cu nan a supla un nivel di $\mu\text{g/l}$ cu ta mas ahalto cu ley ta permiti. Pa ley nan tin di perde rijbewijs y presenta obligatoriamente dilanti Huez.

Pa colmo, di e 6 persona cu a perde nan rijbewijs, tabatin 2 chauffeur tabata asina burachi cu ni por a supla door di esey nan a perde nan rijbewijs. Tambe tin 2 chauffeur a



wordo deteni aña pasa caba y nan rijbewijs a wordo kita di aña pasa.

Tirando un bista di e lista di aña pasa Carnaval 70, e tempo ey a detene 11 chauffeur.





Awo cu 2 florin mas, bo por gana e


MEGA PLUS

*Afl.

350.000,-

*Afl. 250.000,- + Afl. 100.000,-
extra

Benta ta sera 7:30 pm y sorteo ta hunga 7:45 pm



HUNGA AWO



Famia core solicita yudansa pa hoben den auto cu inespera a bay fo'i tino

ORANJESTAD (AAN): Un famia coriendo Diadomingo anochi den area di Santa Cruz y Macuarima, diripiente a ripara cu un hoben menor di edad den nan auto a manera bay fo'i tino. Ni kico nan haci, e no tabata reacciona ni habri su wowonan. E famia a core para banda di caminda, y uno a baha bay pidi yudansa na un Restaurant di Fast Food cu tin eyman, pa pidi nan core yama Ambulance pa nan. E trahadornan mesora a reacciona y core yama 911 pa pidi yudansa.

Mesora un unidad di Ambulance a mobilisa pa Santa Cruz, y na nan yegada a bin topa cu e hoben di 17 aña cu ainda no tabata reacciona. Ta parce cu e lo a ingeri algo cu a pone su curpa shutdown, comosifuera el a intoxica cu algo.

A core pone riba brancard y sali cu urgencia pa Hospital unda kizas lo bay spula su stoma, of check ki otro sintoma e tin cu a pone pasa den e episodio aki di blackout.



Polis a kita rijbewijs di nuebe chauffeur despues di Parada na Playa



ORANJESTAD (AAN): Riba Diadomingo tanto prome, durante, y despues di Parada Grandi di Carnaval na Playa, e unidadnan motoriza di Cuerpo Policial tabata activo riba careteranan di Aruba cu control den trafico. Esaki cu e focus dirigi riba maneha bao influencia di alcohol despues di parada grandi di Oranjestad.



Vocero policial Liliana Rasmijn a confirma cu nan a controla prome, durante y despues di parada grandi di Oranjestad.

Por a tuma nota cu a controla varios chauffeur y a detene den total di 13 persona, di cual 9 a perde nan rijbewijs. Esey ta debi cu ora di supla riba e

aparato, esaki a sobrepasa e maximo di $\mu\text{g/l}$ permiti pa ley. Pues nan a perde nan rijbewijs y ta obligatorio pa nan presenta dilanti un Huez.

Tirando un bista pa Carnaval 70 di aña pasa, esey tambe tabatin 13 detencion di chauffeurman.



TRABOU DI MANTENCION
RIBA LIÑA DI DISTRIBUCION
PARADERA
Interupcion di Coriente Planea

En conexion cu trabounan necesario pa mantene un suministro di coriente confiable, e servicio di coriente lo wordo interumpi:

Diahuebs, 6 di maart 2025
8:00 AM te cu 4:00 PM

Den vecindario di:

- Hooiberg (un parti)
- Hooiberg Kavel (un parti)
- Meiveld (un parti)
- Paradera (un parti)
- Pavia (un parti)
- Piedra Plat (un parti)
- Rooi Afo (un parti)
- San Barbola (un parti)
- Seroe Preto – Paradera (un parti)

N.V. ELMAR ta pidi disculpa pa e inconveniencia cu e interupcion di coriente aki por causa.

Lo cera trafico riba algun caminda den e area durante e dia di trabou, pa seguridad di nos techniconan y esnan den e area.

Danki pa e comprension.



ELMAR

Pa temporada 2025 te cu 2040

Gobierno a haya sa kico e ‘costonan berdadero’ ta pa cuido di adulto mayor

- *Hopi reclamo cu algun adulto mayor no ta haya suficiente cuminda*
- *Pone atencion pa organizacionnan di cuidu funciona optimalmente*



ORANJESTAD (AAN): Si-
man pasa, Directie Ouderenzaken tabatin un cita cu Min-
istronan, pa asina a duna un
presentacion audiovisual riba
un aspecto importante pa con
Gobierno tin di atende asunto
di Adultonan Mayor na Ar-
uba. E biaha aki, e topico a
enfoca riba e “Costonan ber-
dadero” di cuidu pa adulto
mayor.

Aruba tin diferente categoria
di cuidu, y tanto Ministro
Ursell Arends como tambe
Ministro Presidente Evelyn
Wever-Croes a haya splica-
cion na placa chikito, ta kico
esaki tur ta encera.

Claro a presenta informa-
cion tambe, di con mester
inverti y pone atencion ariba
pa organizacionnan di cuidu
por funciona debidamente.
Esaki usando e bedrijfvoer-



ingsmodel di AAG, cual ta
centralisa hende, proceso y
sistemanan cu por mehora e
cuido pa nos adultonan may-
or.

Tur esaki ta algo cu Gobi-
ernonan na Aruba tin di bay
tene hopi cuenta cune. Y
tambe scucha por fabor rec-
lamo di ciudadanonan eyfo,
cu tin un Adulto Mayor cu
ta kedando na un Centro pa
Anciano riba e isla. Ultimo
tempo por a tende basta rec-
lamo cu aunke nan ta pagan-
do un suma mensual pa cuida
nan ser stima di edad grandi,
e reclamo cu nan ta haya hopi
biaha ta cu e ancianonan no ta
haya ‘suficiente cuminda’ pa
come. Famianan mes ta haya
nan cada biaha ta trece extra
cuminda pa nan ser stima
come apart den su camber.

E reclamo aki a bin ta sa-
liendo mas y mas riba super-
ficie, y e ta un preocupacion
awor tambe pa siguiente Go-
bierno atende cune.

Kizas nos adultonan mayor
no ta costumbra di come cu-
minda cu dietistanan ta pre-
senta pa nan, e.o. cuminda
cu proteina “mas liviano”,
manera pisca, galiña, webo,
y hasta tofu. Pasobra si bo
laga nan come e cuminda
perfecto, e lo por yuda esnan
di edad grandi keda mas sa-
ludabel y activo. Tambe fruta
cu berdura, grando completo,
proteina di poco vet, y tambe
productonan di lechi di poco
vet, tur esey ta componente-
nan esencial pa un dieta sa-
ludabel pa nos grandinan.

Excepto cu hopi biaha nos
grandinan no a costumbra
come esakinan, y ora nan
haya esaki riba nan tayo pa
come na e Casnan di Ancia-
no, nan ta sinti cu e “cuminda
no ta suficiente”, y ta cumin-
za keha cerca nan famia. Tin
caso unda famia a haya nan
ta muda nan ser keru for di
un Cas di Anciano, y mande
pa un otro. Na e otro si, e
adulto di edad grandi a keda
satisfecho cu e cuminda cu ta
wordo sirbi eynan. Pues toch
ta algo pa inclui den un estu-
dio na Aruba pa haya sa con
satisfecho clientenan ta cu e
cuminda.

City Inspector contento cu reaccion di publico pa usa saco di sushi



ORANJESTAD (AAN): Bureau City Inspector
ta satisfecho! Pesey nan kier a manda danki na e
pueblo carnavalesco cu a haci bon uso di e saco nan
cu a wordo reparti durante e paradanan di Carnaval.

Bureau City Inspector tabata activo a lo largo di e
ruta ta reparti saco pa e paradanan di Carnaval 71. Y
ta contento cu e reaccion di publico. Di e forma aki,
Bureau City Inspector a contribui cu nan granito di
santo pa asina yuda e isla keda limpi.

Y ta bunita pa mira con grandi y chikito ta mira e
importancia pa benta sushi den saconan, pa asina a
yuda grandemente pa mantene e rutanan di Carnaval
y Aruba limpi! Corda cu pa un Aruba dushi, ta un
Aruba sin sushi!



Yen di ambiente y tur cos netchi den Parada Grandi di San Nicolas



ORANJESTAD (AAN): Un biaha mas, San Nicolas a sa di muestra con dushi, bibo, y alegre su Paradanan ta pasa den su cayanan, na forma ambientoso y netchi.

Y pesey mes bo ta mira participantenan den e Parada Grandi di San Nicolas cu un sonrisa constante riba nan cara, y e movimiento di curpa pa asina showcase nan trache y bodypiece ta sigui asina fluido cu e ta hasta agradabel pa wowo di mirones banda di caminda.

Aki DIARIO ta presenta un seleccion di imagennan di e bunita Parada Grandi di San Nicolas. Palabra di pa-bien na tur grupo, tur diseñador, tur costurero, y demas ayudante.



Continuacion pagina.6



Paradanan Grandi a habri cu Massive Brass cu nan estilo unico



ORANJESTAD (AAN): Un forma diferente di presenta Brassband por a wordo mira Diasabra merdia, y tambe Diadomingo mainta durante e Paradanan Grandi di tanto San Nicolas y Playa respectivamente. Riba un trailer mahestuoso, Massive Brassband atrobe a duna un fenomenal homenage dirigi na e musica di Asambeho cu ta algo unico di Aruba. Y e biaha aki sosteni pa e.o. Go Cultura Foundation, y tambe Aruba Tourism Authority.

E idea tabata great! Un trailer lastrando e Brass Section na halto, y abao por mira tur snares y drums ta wordo toca. Un celebracion di Cultura, Musica y Magia Carnavalesco.

Go Cultura Foundation ta sinti hopi honra, agradecido y entusiasmo pa colabora atrobe cu Aruba Tourism Authority (A.T.A.) pa un otro proyecto espectacular di Carnaval. E aña aki, a presenta cu gran orguyo, Massive Brassband. Cu un tributo na algo netamente di nos y cu ta forma parti importante di nos herencia musical: Asambeho.

Massive Brassband su musiconan talentoso lo sacudi e cayanan di Aruba durante Carnaval 71 cu un energia sin igual. Nan a presenta un ritmo contagioso, vibracion incontrolabel y un sonido cu ta impacta henter bo curpa.



BUY 1 MEDIUM

PIZZA

CHOOSE BETWEEN BBQ CHICKEN
PEPPERONI FEAST
DELUXE • VEGGIE • OR 2 TOPPINGS

WITH 1 STUFFED BREAD SIDE ORDER CHOICE OF

- STUFFED CHEESY BREAD
- STUFFED CHEESY BREAD W/BACON
- STUFFED CHEESY BREAD W/BACON & JALAPENO
- PEPPERONI STUFFED CHEESY BREAD

ALL FOR 39⁰⁰ AWG

Excluding Delivery Charge



PALM BEACH
586 0333

PARADERA
582 0333

SAVANETA
584 0444

BOULEVARD
583 0333

ORDER AT
[DOMINOSARUBA.COM](https://www.dominosaruba.com)

Download on the
App Store

GET IT ON
Google Play



Algun bunita Roadpiece diseña na forma unico a captura atencion na San Nicolas



ORANJESTAD (AAN): Diasabra merdia a tuma lugar na San Nicolas, e Parada Grandi di Carnaval 71, y e biaha aki mey-mey di e abundancia di musica, y combinacion di colornan, loke a hala hopi atencion ta diferente roadpiece crea y diseña na forma unico.

Esaki un biaha mas ta resalta e creatividad di e gruponan local cu ta haci uso tin biaha di diseñonan minimalistico cu toch na final ta produci un resultado cu ta keda graba den mente di tur hende para a lo largo di e ruta di Carnaval.

Huradonan semper ta pasa check tur e roadpiece den parada, pa mira con nan a wordo decora, pa check si a tuma tempo pa haci esaki, of ta djis algo di “traha vap vap”.

Hecho si ta, cu nantabata bunita y sigur a yuda haci e Parada Grandi di Carnaval 71 bira uno memorabel pa pueblo di San Nicolas.

Marco Berlis di MEP a mira e rapport

Banco Central di Aruba mes ta indica cu economia di e isla a crece fuertemente



ORANJESTAD (AAN): Recientemente un critico a duna un opinion “di bom” riba nos economia. Lamentablemente e critico aki cu no ta un economista, ta afilia na partidonan opositor y deliberadamente a exclui rapportnan di instancianan financiero/economico manera Banco Central di Aruba, EBA, (Economisch Bureau Amsterdam) y CAft mes. Esaki ta un fayto mortal, mirando cu nan rapportnan ta esencial si e kier tin credibilidad.

Segun Marco Berlis, miembro di MEP, Banco Central di Aruba ta rapporta cu crecimiento economico

fuerte a tuma lugar 2023-2024. E “critico” aki ta lansa varios preguntanan cu intencion pa crea suspenso y disgusto bao pueblo. Riba 25 di Februari Banco Central a saca su publicacion di e “State of the Economy” pa e prome 9 lunanan di 2024, den cual nos por constata un biaha mas cu economia di Aruba a crece fuertemente cu 7.8%! Rapport di BCA ta muestra esaki claramente y por ser lesa riba nan website di cbaruba.org

Gobierno: A duna back pa subi poder di compra y duna alivio social. E pregunta di e “critico” ta lubida cu tabata tin un

pandemia y con Hulanda a pone nos “sector di salud” bao presion enorme; mester a economisa 60 miyon pa aña! Sinembargo, pueblo sa un tempo caba cu nos economia a “bons bek” milagrosamente pa asina Gabinete Wever-Croes por a cuminsa duna back na pueblo for di 2023. Algun hecho; - A duna indexering na ambtenaar 11.7%, loonbelasting/inkomstenbelasting pa esnan di 1986-5000 Florin pa luna a baha, a baha Premie di AZV pa pensionado cu mas cu 50%, a aumenta pensioen cu 400 Florin, a aumenta reparatietoelag cu 100 Florin pa pensionado, reparatie toeslag a subi cu 75 Florin, bijstand pa esnan special a subi cu 180 Florin y mas.

SVb y AZV ta aumenta fondo di reserva pa “dubbele vergrijzing.” E institucionan di SVb y AZV no ta pa genera ganashi pero si a bin ta traha responsablemente pa crea fondonan di reserva pa e “dubbele vergrijzing” cu lo tuma lugar pronto. AZV y

SVb ta haci esaki pa sigura cu lo tin suficiente placa den fondo pa por sigui cubri e cantidad creciente di pensionado cu lo bira dobbel dentro di algun aña. Riba recomendacion di CAft a crea e “reservanan” aki, y a zorg pa fondonan continuamente mester worde aloca pa solidificanan.

CAft: Debe y Interes di pais Aruba ta riba bon caminda! Ora bo ta critico e ta importante pa bo lesa rapportnan manera esun di CAft, cual repetidamente ta keda señala cu Aruba ta riba un caminda solido di recuperacion y a existi pa Aruba yega 70% di debe/GDP pa 2029 pero en realidad nos a yega 71% na 2024 caba. Contrario na Mike Eman, Gabinete Wever-Croes a traha duro pa rescata nos pais di e megadebe cu ainda tin 20 aña mas pa paga, a muestra curashi y liderazgo durante pandemia, y a demostra grandesa cambiando e crisis financiero extremo di 2020-2022 den un crecimiento y boom economico historico. Ademá, Gabinete

Wever-Croes a yega un arreglo cu CAft pa loke ta jaarrekeningnan certifica, mientras Parlamento ta hayando tur documento di presupuestonan supletorio, y comentarionan di CAft pa por controla unda cada Florin di nos fondonan publico abay. Preocupacion grandi mi tin ora e “critico” ta bisa cu Gobierno ta keto riba loke ta e debe y interes cual e ta considera un bom pa Aruba, mientras cu semper gobierno a duna informacion transparente atraves di ruedanan di prensa riba e topiconan aki. Adicionalmente, ta bon pa remarca cu e eliminacion di e RAFT y e introduccion di un “hybride rijkswet,” cual lo bay regula refinanciamiento di un gran parti di e megadebe na 3.4%, lo baha e presion di interes y debe riba nos presupuesto. Pesey mi ta convenci cu Aruba tin speranza, un fundeshi fuerte cu Gabinete Wever-Croes a laga atras pa Aruba por sigui lidera Caribe den recuperacion economico y inversion social pa nos pueblo.

Den cada distrito tin un Recherchedienst:

Fiscal van der Biezen ta splica e procedura pa atende denuncianan di menasa

ORANJESTAD (AAN)—Den entrevista cu DIARIO, Fiscal Patrick van der Biezen a acentua riba e hecho cu den Ministerio Publico, nan ta atende tur caso, di cual denuncia ta wordo haci, relaciona cu menasa por ehemplo, pero cu mester tin prueba, naturalmente.

“Pero nos no tin e capacidad, na prome lugar na Ministerio Publico pero tambe na KPA, di atende tur caso. Nos tin cierto cuponan y Gobierno tin ora ta duna nos loke ta wordo pidi. Esey kiermen, automaticamente, cu Ministerio Publico no por haci e trabao manera nos ta desea”, Fiscal v/d Biezen a señala.

El a menciona tambe cu ora un hende ta haci denuncia, en principio t’asina cu e procedure ta yega na Recherche. “Manera nos sa tin diferente dienstnan di recherche na Aruba den distritonan. Nos ta parti Aruba den cuater distrito: Noord, Santa Cruz, Playa y San Nicolas. Cada Distrito tin su mes Recherchedienst, y obviamente ora ta haci denuncianan tin un Fiscal den cada Distrito, cu ta atende esakinan”, Fiscal van der Biezen a relata.

E Fiscal a agrega cu si un hende haci un denuncia y nada no a pasa cu ne, por acudi na Ministerio Publico, si e tin copia di esey ta wak



e ora pa atende cu Recherchedienst. El a bisa cu ta importante cu tin un screening process cu ta wordo haci y ta wordo gescreeen tin ora door di un Fiscal.

“Den caso di menasa, si tin prueba, e caso ta wordo atendi. Ta bon pa remarca tambe,

cu no tur menasa ta segun e Codigo Penal, pasobra tin cierto menasanan cu tin cierto requisito cu mester yega na dje, pa bo por tin un menasa penalmente” Fiscal van der Biezen a comenta.

Como un ehemplo, el a indica cu si bo bisa un hende: ‘ora mi topa bo pafó, bo ta wak kico ta pasa cu bo’ no ta concreto suficiente pa bisa cu e ta un menasa penalmente. “Nos por sintie cu e ta fastioso, bo ta sinti bo cu ‘e ta menasando mi’ y e sentimiento ey no ta dushi. Pero, huridicamente, e no a yega ainda na un etapa di ta un menasa penal, segun e sistema di ley. Pasobra e articulo di ley di menasa ta

menciona algun actuacion cu lo mester tin pa bo lo uza como menasa”, Fiscal van der Biezen a señala.

Si un hende ta lanza e palabranan “mi ta bay mata bo” e ta un menasa, evidentemente, contra e bida di e persona. Of menasa un hende cu maltrato severo, tambe. ‘Kima mi ta bay kima bo cas’ tambe ta un menasa penalmente. “Pues, ta depende di ki palabra ta wordo uza, y no palabra so, actuacion tambe, por ta un menasa, y esey un persona por bisa cu el a haci un denuncia di menasa, pero no a scucha nada mas, por ta pasobra mester tin prueba di menasa.

Tres detencion so den

Polis a stop Parada Grandi di Carnaval na San Nicolas debi cu a bira anochi

ORANJESTAD (AAN): Riba Diasabra cu a pasa, pa exactamente 12'or di merdia, Cuerpo Policial hunto cu Dirigentenan di SMAC a duna 'start' pa e Parada Grandi di Carnaval na San Nicolas.

Diasabra tabata tin 9 grupo, last lap y mas o menos 3.000 participante. Vocero Liliana Rasmijn di Cuerpo Policial, a confirma cu di parti di autoridad nan a conta cu 220 personal riba pia. Diferente departamento di Polis a traha hunto entre otro Polis Uniforma, ME, Motor Unit, Flex Team, K-9, Mobile Commando, O.C.C., Planologie, departamento di recherche, Personal administrativo y tambe personal di CEA.

Pa 5:08 pm, e cabez di e parada a yega Joe Laveist Sports Park. E rabo di par-


ada mes no a yega ainda na final, pero Polis a dicidi pa 7:32 pm, pa stop e parada mirando cu e truck di grupo Empire a confronta problema. A tuma e decision pa para e musica di e banda y di e lastlap. Esaki pa seguridad di un y tur debi cu a bira nochi.

E aña aki a conta cu 3 detencion. Entre otro pa: no sigi ordo di polis, resisti contra polis, arma blanco (switch blade) posesion di droga. Esaki ta un reduccion enorme compara cu Carnaval 70 di aña pasa. E dia ey na San Nicolas tabatin 19 detencion.

Cuerpo Policial ta contento cu e resultado di Diasabra na San Nicolas. Den nan declaracion, a bisa: "Pueblo a sa di comporta nan mes y gosa di nos dushi Carnaval."



Un suplica na DOW pa ubica un ABRI cu asiento y señal di bushalte entre e rotonde di Ponton Y Tanki Flip



ORANJESTAD (AAN) – Algun luna pasa DIARIO a trece dilanti e situacion cu tin na Ponton, unda cu di e rotonde di Ponton te e rotonde di Tanki Flip, no tin ni un solo bushalte, y e usuarionan cu ta warda bus pabao di borch grandi di ex-WEMA, no por mira ora e bus ta biniendo pasobra tin hopi auto grandi cu ta para riba acera dilanti e negoshinan cu tin eynan.

Den pasado tabata tin un señal di bushalte net unda tin un mata halto di kwihi, cu ta e unico area unda tin un poco sombra y brisa. Pero ta parce cu un par di aña atras e bushalte aki a desaparece, y nunca mas a pone uno nobo, mi mas cu diferente hende a yama DOW pa, por favor, haci esaki. Pero no tin duda cu ademas di un señal di bushalte ta hopi

necesario pa ubica bao di e kwihi un ABRI completo cu su asiento. En berdad cada bez tin dos, tres of cuatro pasahero ta warda bus eynan, precisamente pa e incomodidad cu tin, pasobra no tin lugar pa sinta. E doño di e car wash cu ta ubica na haltura di e kwihi, a pone un banki di palo pa hende cu ta bin warda bus eynan, vooral 11'or y 12 or merdia,

entre nan muchanan di scol, por sinta y scapa un poco di calor, pero e ta funcional y unda ta poni tin momento cu ta imposible pa wak e bus bini, debi na strobamento constante di autonnan, specialmente esnan grandi. Un yamada mas DIARIO ta haci pa peticion di e usuarionan cu tur dia ta warda e bus eynan, na DOW. E chauffeurnan di Arubus no ta para

pariba di e palo di kwihi, nan mes ta bisa cu eynan ta e parada pasobra eynan e bushalte cu a conoce tabata prome. E ABRI cu su asiento y e señal di bushalte ta sigur cu si, un gran necesidad pa e area aki di ponton (entre ambos rotonde).

Riba potret DIARIO ta bolbe muestra e situacion describi.

Carnaval di San Nicolas cu algun body-piece fenomenal



ORANJESTAD (AAN): Pa Carnaval 71 ta parce cu e toque di beyeza y perfeccionismo riba e body-piece di diferente Carnavalista a sobresali grandemente. Nan tabata luci riba e ruta durante Carnaval di San Nicolas, y publico tabata haya un bista formidabel di cada uno di nan. Sin duda alguno, palabra di pabien na e lidernan di e.o. TOB Carnival Group, Dushi Carnival Group, Royal Carnival Group, Los Laga Bai Carnival Group, OPC Carnival Group, Aruba Tourist Carnival Group, Champagne Carnival Group, Colours Carnival Group, y Empire Carnival Group cu a haci e Carnaval bira uno cu ta blink y briya tur caminda. Pueblo a keda papia henter weekend di e bunita body-piece cu a resulta fenomenal durante parada. E ta demostra cu nos pueblo tin hendenan hopi creativo, agil, y master den traha disfraz pa Carnaval. E ta un experiencia adkiri danki na 71 aña di experiencia.



Carnaval di San Nicolas

Continuacion pagina.12



Pueblo di Aruba tambe ta feliz

José Gregorio Hernández a bira e prome santo venezolano

ORANJESTAD (AAN): Manera cu a wordo publica siman pasa caba riba paginan internacional rond mundo, hecho ta cu danki na decision di Papa Francisco, awor si e tan stima Dr. José Gregorio Hernández ta bira e prome santo venezolano. Un momento di felicidad no djis pa pueblo di Venezuela, sino pa su gran y fiel fanatico-nan tambe na Aruba.

E anuncio aki a ocasiona hopi alegría y felicidad, cu Papa Francisco a aproba e votonan faborabel pa e Sesión Ordinario di Pastoor, Cardenalnan y Obisponan di e Dicasterio pa Causa di Santonan pa e canonización di e beato venezolano José Gregorio Hernández Cisneros.

Papa a dicidi pa yama den lunanan venidero un consistorio di Cardenalnan cu ta trata entre otro e puntonan di canonización di otro beatonan den cual lo bay stipula e fechanan. E informacion aki a wordo publica den e boletín di Oficina di Prensa di Vaticano dia 25 di Februari 2025.

E acontecimiento historico aki, cu a wordo spera masha hopi mes pa pueblo venezolano y tambe na Aruba, ta un reconocimiento pa e bida ejemplar y e virtudnan heroico di un homber kende a dedica su existencia pa alivia e sufrimiento humano y transmitir un mensahe di amor y esperanza. Iglesia Católico ta reconoce su bida di santidad, acompaña pa un debocion universal, cu awor ta ser permiti pa e wordo hisa pa altar.

Un proceso historico: E canonización di José Gregorio Hernández ta un etapa historico pa su pueblo y pa Iglesia Católico. Ta trata di e prome santo venezolano proclama pa Iglesia Católico Universal. Su Causa pa Santidad a cuminsa un poco despues di su morto na 1949, ora cu Monseigneur Lucas Guillermo Castillo tabata



Arzobispo di Caracas, y a pasa pa diferente etapa mientras añanan a pasa. Na 1986, Papa Juan Pablo II a declar'e 'Venerable', reconociendo su virtudnan heroico. Na 2020, Papa Francisco a aproba un milagro atribui na su trabao, loke a habri caminda pa e wordo beatifica na April 2021.

Finalmente awor dia 25 di Februari 2025, Papa Francisco a aproba e voto positivo pa su canonización, y e fecha pa esey lo wordo duna aki algun luna.

Diferente persona a acompaña den e proceso aki, principalmente e Cardenalnan Baltazar Enrique Porras Cardozo y Jorge Liberato Urosa Savino, kendenan a keda pusha pa esaki grandemente. Tambe tin diferente postulador y vice-postulador pa esaki, entre cual ta destaca Dr. Silvia Correale, tambe P. Gerardino Barracchini, Monseigneur Tulio Ramirez Padilla, y Monseigneur Fernando Jose Castro Aguayo.

Bida y obra di un Santo: Dr. José Gregorio Hernández a nace na Isnotú na estado Trujillo dia 26 October 1864. For di hoben el a demostra un gran inteligencia y un vocacion profundo pa duna servicio. El a gradua como docter na Universidad Central di Venezuela, y a bay specializa na Paris, unda el a destaca pa su excelencia

academico y su compromiso social.

Ora el a regresa Venezuela, el a traha cu yen pasion como Docter, y a entrega su servicio especialmente na esnan mas pover y esnan menos afortunada. Su consultorio a bira den un refugio pa esnan cu no tin recurso pa por a haya yudansa medico. Dr. José Gregorio Hernández no solamente tabata cura hendenan malo, sino tambe tabata duna consuelo espiritual y apoyo emocional na su pashentnan.

Ademas di su trabao como medico, Dr. José Gregorio Hernández tabata un homber di profundo fe catolico. Su religiosidad a rondona su bida y su trabao, y el a demostra semper su amor pa prohimo y su dedicacion na esnan mas den necesidad.

Desde su morto na 1919, Dr. José Gregorio Hernández a converti den un figura iconico na Venezuela y rond mundo. Su fielnan tabata haci oracion pe busca di sana nan mes.

Su bida y su obra ta un ehemplo di amor na prohimo, di entrega su mes na otronan y di hopi fe den Dios. Su legado a keda biba den curazon di esnan cu tabata vener'e, y di esnan cu a ricibi e milagronan di Dios bao su intercesion.

Dr. José Gregorio Hernández ta un santo pa e tempo aki, un modelo di laico

cristian cu ta invita tur hende pa biba e fe cu alegría y compromiso, y pone na servicio di otronan, tur nos talento y capacidadnan.

E canonización di José Gregorio Hernández ta motibo di celebracion pa tur hende.

Opinion di Papa Francisco: A bin sali na cla, cu Papa Francisco a aproba e decreto pa e canonización di e beato venezolano José Gregorio Hernández Cisneros. El a haci esey mientras e tabata hospitaliza den Hospital Gemelli na Roma, debi na pulmonia bilateral, segun Vaticano a informa.

Francisco a firma e decreto durante e bishita cu Secretario di Estado Vaticano, Pietro Parolin a haci cerca dje, acompaña pa Secretario Interino di Estado, e venezolano Edgar Peña Parra.

Dr. José Gregorio Hernández conoci como e "Docter di Pobernan" (1864-1919) a wordo beatifica dia 30 di April 2021 na Caracas.

Papa Francisco a yega di papia di e figura di José Gregorio Hernández despues di e beatificación: "E tabata un docter yena di ciencia y di fe y tabata por a reconoce den esnan cu malesa e cara di Cristo. Como bon samaritano, el tabata yuda nan cu caridad evangelico," e pontifice a declara despues di e rezo di Regina Coeli dia 2 di Mei 2021.

E ceremonia di beatifi-

cacion tabata uno chikito, cumpliendo cu medidanan di seguridad y salubridad publico cu tabata valido e tempo ey pa cu e pandemia, y solamente 150 persona tabata presente. E beatificación a bira posibel despues cu Francisco a reconoce e milagro cu Dr. José Gregorio Hernández a duna na e mucha muher Yaxury Solórzano Ortega. El a ricibi un tiro den cabez durante un atraco mientras e tabata cu su tata. Docternan cu a atende a bisa cu por haci nada mas pa e mucha muher. Esey a socede na Maart 2017 na estado Guarico, ora e mucha muher tabatin 10 aña. Despues cu e docternan a bay bisa e mayornan cu e mucha muher ta bay muri, su mama a haci oracion na Dr. José Gregorio Hernández pa e wordo cura. Pa e motibo aki, segun e version di famianan, y confirma pa Papa, e mucha muher a salba.

E Docter di Pobernan, un medico cu a combina su conocementonan científico y su fe grandi pa religion durante su 54 aña di bida, semper a wordo hopi respetado na Venezuela. Na dje nan ta atribui miles di milagro, y solamente esun di e mucha muher aki a wordo reconoci door di Vaticano. E popularidad y cariño entre e ciudadanonan, cu despues di su morto a cuminsa vener'e y yame santo, a cuminsa desde cu e tabata hopi hoben, debi na e generosidad cu cual semper el a actua.

E Docter a fayece na Caracas dia 29 di Juni 1919 ora un vehiculo a dal'e, y den e caida el a fractura su craneo ora cu el a dal duro contra un acera.

Na su entierro miles di hende tabata presente, y e sero principal di Caracas, conoci como 'Avila', a keda sin flor despues cu tur a wordo corta pa wordo hiba pa e Docter, y su caha di morto mes a wordo carga den braza door di ciudadanonan di pueblo.

Casi 25 mil webo confisca y destrui na Turks & Caicos



COCKBURN TOWN: Departamento di Agricultura na islanan di Turks and Caicos, siman pasa a confisca y destrui casi 25.000 webo cu a wordo importa ilegalmente for di Republica Dominicana.

Oficialnan di cuarentena a descubri e contrabando (total di 24.840 webo) escondi den e parti patras di un Container durante un inspeccion rutinario di articulonan importa riba Diahuebs siman pasa.

Autoridadnan mesora a confisca y destrui henter e cargamento, segun protocol stipula bao di e Ley di Salud di Animal 2024.

E importador (di cual su identidad no a wordo divulga), a wordo acusa awor di a viola leynan di importacion y lo por bay ricibi boetnan hopi fuerte.

“Departamento di Agricultura ta riba alerta desde 2022 pa evita entrada di cualkier malesa riba Turks and Caicos pa proteha salud di e animalnan di cria aki, e salud di nos animalnan endemico y salud publico ta primordial,” ta loke nan a indica den un boletin pa prensa.

E cargamento confisca a bin despues cu awor tin hopi preocupacion pa e HPAI-Griep Aviar (‘Bird Flu’) cu a bin ta plamando den henter continente

Americano. E malesa aki cu por destrui crianan di galiña na cualkier isla, a wordo confirma recien na Puerto Rico, y ta nifica un menaza zoonotico, nificando cu e por contagia humanonan tambe.

Autoridadnan di salud na Turks and Caicos ta adverti cu Republica Dominicana no a declara su mes liber di HPAI, pues e ta un riesgo halto di origen pa produccion di animal. “Ademas, Republica Dominicana ta conoci di tin otro malesanan preocupante, manera African Swine Fever, cu ta afecta porco. Resultado di esey ta cu tur producto di porco, incluyendo sausage, ta estrictamente prohibi pa wordo importa na Turks and Caicos,” segun e boletin ta indica.

Departamento di Agricultura ta recorda tur importador y pasaheronan cu ta yega via avion, cu tur producto di animal procedente di Republica Dominicana ta keda estrictamente prohibi, pasobra “e momento aki e revision di Riesgo no a wordo haci pa importacion di Republica Dominicana”.

Importadornan ta ser pidi pa busca aprobacion prome cu nan trece cualkier animal bibo, of producto di animal den islanan Turks and Caicos.



Buscando forma pa tur hende cuminsa planta Mata di Lamunchi atrobe



ORANJESTAD (AAN): Den un pasado no mucho tempo atras, ta casi tur cas na Aruba tabatin un mata di Lamunchi ta crece. Esaki ta algo cu tabata placentero pa mira! Pesey semper na hopi cas ta tur dia bo por haya canica grandi cu Juice di Lamunchi den dje ta fria pa famia bebe di dje. Casi no mester bay Supermarket cumpra Lamunchi, pasobra na bo cas, of na cas di bisiña, of na cas di wela mes bo por haya cumpra.

Pero alrededor di 20 pa 25 aña pasa, un malesa di mata a casi elimina tur mata di Lamunchi cu tabatin planta rond di Aruba. Ni maske kico a haci, nan a perde tur nan blachi y e tempo ey asina nan a muri.

Pero awor Santa Rosa kier pa pueblo cuminsa planta Mata di Lamunchi crioyo bek. Siman pasa nan a anuncia cu nan tin Lamunchi den potchi na benta.



Por pasa entre 7:30 am y 2:30 pm pa cumpra. Ban planta Lamunchi bek manera nos grandi nan tabata hasi pa por traha juice, usa den cushina of cu te ora di griep. Corda warda tur simiya pa boso por replanta despues of trece nan pa Santa Rosa por planta mas.

Parada Grandi di Playa tabata yena cu luho y beyesa

ORANJESTAD (AAN): Diadomingo mainta pa exactamente 11:00 am, e Parada Grandi di Carnaval 71 na Oranjestad a start, y e biaha aki dedica na Cuerpo Policial di Aruba.

Y mientras cu e gruponan musical a cuminsa ta move bay dilanti, wowo di tur hende mesora a cuminsa cay riba e luho, briyo, atraccion, y beyeza completo di e participantenan den Parada, cu a demostra cu keto bay e creatividad extremo di disfraz di Carnaval ta birando cada aña mas sofisticada.

Gruponan cu a briya y luci

di pia te cabez tabata TOB Carnival Group, Dushi Carnival Group, Champagne Carnival Group, Aruba Tourist Carnival Group, OPC Carnival Group, Colours Carnival Group, Los Laga Bai Carnival Group, Empire Carnival Group, y Royal Carnival Group.

A nota cu personal di sosten di cada grupo, incluyendo security, Bar, y lidernan a haci un bon trabao. Publico a saca potret bay goal di tur participante y riba combinacion di potret por mira un seleccion di esnan cu a haci Carnaval 71 grandi.



Parada Grandi di Playa

Continuacion pagina.16



Columna E

Sembrado



Diamars 4 maart. Di ochosiman den tempo ordinario aña 2025. Ciclo C

CalendarioLiturgico
Lectura: Sirag 35, 1-12;
Salmo:50;
Evangelio: Marco10,28-31;

”Mira connos a laga tur cos y sigui Bo.” Marco 10,28

Caridad y berdad, den cualHesucristo a duna testimonio den comien-sodi subida Cristian y pa medio di sumorto y resurreccion. Ta e forsa principal cu ta (empuha-drive) e desaroyoautentico den cada persona of humanidad. Amor ----CARITAS ---- ta un forsaextraordinariocu taguia pueblo, opta pa curashi y un compromisogeneroso di husticia y paz. E forsaaki tin suorigen den Dios, ta Amor eterno y Berdadabsoluto. Segun e plan di Dios, cada persona lo adkeri, pe porrealisa-completamente e Boluntad di Dios, pe descubri e berdad y pa medio di e berdadaki e keda liber (Hn. 8,32 ”Boso lo conoce e berdad y e berdad lo haciboso liber.”) Pa defende e berdad cu humildad, conviccion y pa ser testimonio bibo, lo e tin cu adkeriformanan di caridaddisponibel pa esaki. Defacto Caridad ta ”Alegrabomes den e BERDAD” (1Cor. 13,6 ”E no takedacontento cu inhusticia, pero cu Berdadsi”). Tur hende ta sinti un empuhe interior pe Amor autenti-coaki; amor y berdadnunca lo bandona nan completamente, paso ta esakinan ta e vocacionnan planta pa Dios den cadacurason y mente, den cada un ser humano.

Oracion:Señoryenanos cu gran respet pa Bo Santa Boluntad y firma-nos den Bo amor. Amen.

Grupo Centro Pastoral

> SUDOKU <

Conceptis Sudoku

By Dave Green

	6			9		2		
			4		2	6		7
5	9				3			
	4	7					2	
6				4				1
	3					4	5	
			3				6	2
4		6	7		9			
		1		2			8	

Difficulty Level ★★

10/04

HARI UN TIKI

Un homber a yega tur cansa cerca su hefe “Hefe, mi mester bay di urgencia, mi ta bay bira tata”.
“Bay, bay numa”, e hefe a bise.
E dia siguiente e hefe a puntra e homber “Y kico e ta, un mucha muher of mucha homber?”
“Wel nos no sa ainda, pasobra ta aki 9 luna mi por bisa”.

BUSCA PALABRA

INTELIGENCIA

V	N	A	D	I	M	E	B	R	D	G	P	D	A	F	Z	V	A	P	X
R	A	P	E	W	I	L	T	U	H	R	Q	G	S	R	F	B	I	D	B
I	N	Y	O	G	A	K	T	N	O	S	C	K	I	F	B	R	G	O	N
C	D	V	U	B	B	N	J	D	E	N	P	P	T	Y	S	L	O	C	F
G	A	N	L	K	E	P	U	B	A	M	L	Q	E	T	Z	O	L	U	D
V	D	I	A	B	V	C	P	N	X	H	L	R	N	J	Z	V	O	M	V
K	I	V	U	L	C	Q	O	C	G	E	S	A	C	U	K	T	N	E	Y
B	S	H	A	I	S	T	L	T	X	Q	B	I	I	C	U	U	H	N	H
L	E	N	O	E	N	O	B	K	C	V	N	H	A	D	B	C	C	T	Q
D	C	N	Y	E	T	O	B	N	F	I	K	K	R	K	N	X	E	A	D
K	E	K	M	V	L	A	I	C	I	F	I	T	R	A	U	U	T	C	H
P	N	O	S	O	C	E	T	N	E	M	A	I	R	A	I	D	M	I	T
O	M	Z	D	C	M	A	J	H	J	M	M	A	G	Q	A	W	S	O	M
G	Z	C	A	X	S	S	M	Z	A	O	T	W	J	U	A	K	O	N	W
W	I	O	M	M	O	L	J	B	G	B	B	Y	P	I	I	Y	R	B	H
B	Z	Z	C	U	U	F	E	N	I	T	Y	S	K	P	N	A	T	K	Q
A	W	W	I	G	H	L	R	C	Z	O	I	F	R	S	T	V	O	Z	N
U	A	D	V	S	G	C	N	A	T	N	N	O	P	T	E	E	A	X	U
I	V	M	L	W	Y	B	A	Q	T	O	F	A	Q	X	R	S	T	W	F
X	C	K	A	U	F	B	U	E	A	E	R	R	N	M	N	Q	E	I	B
P	F	R	C	R	Y	Y	L	N	S	W	K	N	H	O	A	E	A	J	P
N	A	D	G	N	G	I	Q	I	N	Y	L	O	A	G	C	N	P	E	W
R	V	N	P	M	G	O	O	S	Y	E	L	Z	K	N	I	T	Y	Y	V
H	C	V	D	E	P	N	R	J	O	P	J	U	P	S	O	S	E	C	R
R	H	T	N	E	A	U	W	P	P	F	C	V	C	B	N	Q	I	J	J
Y	R	C	O	L	M	J	X	R	E	S	P	O	N	S	A	B	E	L	J
K	I	H	N	G	M	I	Z	L	B	J	S	A	W	M	L	U	F	B	K
A	I	A	I	Y	O	N	A	N	O	T	R	E	P	X	E	D	D	Q	B
C	N	S	I	N	D	I	C	A	T	O	N	A	N	A	I	Z	E	L	R
D	K	C	X	N	H	X	S	O	J	Y	H	G	Y	B	M	V	W	W	U

ARTIFICIAL
ASITENCIA
CAMBIONAN
DIARIAMENTE
DOCUMENTACION
EXPERTONAN
HUBENTUD
INTELIGENCIA
INTERNACIONAL
LECTORNAN
MOMENTONAN
MUNDIALMENTE
NECESIDADNAN
PANDEMIA
PRODUCCION
PROFESIONALNAN
PROGRAMA
RESPONSABEL
SINDICATONAN
TECNOLOGIA

Answer to previous puzzle

4	6	3	9	5	8	2	7	1
1	8	9	2	7	6	4	3	5
7	5	2	3	1	4	8	6	9
9	1	6	4	8	3	7	5	2
2	4	5	7	6	1	3	9	8
8	3	7	5	2	9	1	4	6
3	7	1	8	9	5	6	2	4
6	9	4	1	3	2	5	8	7
5	2	8	6	4	7	9	1	3

Difficulty Level ★★★★★

10/01

Super cumindanan....super beneficianan !



Awe e promer parti di cumindanan cu por drecha nos salud y alarga nos bida. E cumindanan aki mester forma parti di nos nutricion.

1. Almonds ta contene **vitamina E**, koper, magnesium, proteina y vet saludabel. Almonds por preveni malesanan di curason, cancer y duna bo mas aña di bida.

2. Appel ta considera un fruta poderoso pa motibo di ta rico na vitamina C, B-complex, fibra y mineralnan manera calcio y potasio. Ademas, appel ta yuda preveni dementia, reduci stroke y diabetes.

3. Arugula ta baha presion, reduci e cantidad di oxigeno cu e curpa mester durante ejercicio. Otro beneficianan ta preveni cancer, osteoporosis y mehora oxigeno muscular.

4. Asparagus ta yen di fibra y ta contene nivelnan halto di vitamina B, calcium, zink y magnesium. Esaki tambe ta reduci e posibilidad di diabetes y piedra.

5. Bacoba no tin vet ni colesterol ni sodio pero si ta rico na potasio. Bacoba ta yuda baha presion, reduci riesgo di leukemia bao di muchanan y yuda mantene e curason saludabel.

6. Basil ta yen di vitamina A, K, C, magnesium, hero, potasio, calcio y magnesium. Basil por yuda preveni inflamacion, efectonan di enbhechimento y artritis.

7. Rooibiet poco poco a haya su popularidad pa via cu e ta mehora prestacion atletico, baha presion y cir-



culacion. Mas beneficianan ta cu e ta contene folate, manganese, vitamina B6, betaine, magnesium, potasio, zink, koper y selenium.

8. Bok choy ta pertenece na e famia di broccoli, cauliflower, brussels sprouts y kool.

9. Broccoli ta yen di fibra y rico na vitamina C, A, hero, K, B, zink. Potencialmente broccoli por preveni osteoarthritis, protehe nos contra solo, reduci daño na e curason di diabetes y cancer.

10. Melon ta yen di antioxidante y beta carotene cu ta protehe contra griep te cu cancer, asma, presion, inflamacion y tene bo hidrata.

11. Wortel tin yen di vitamina A y su beneficianan ta preveni cancer di longnan, destrui celnan di leukemia y yuda cu bista.

12. Cauliflower of bloemkool tambe ta un di e berduranan cu ta bringa cancer, e ta contene fibra cu ta yuda baha peso y e digestion.

13. Selder ta rico na anti-

oxidante y vitamina K. E ta yuda baha presion y dolor di joints.

14. Garbanzo ta mehora nivel di sucu y insulina, mantene e wesonan fuerte y ta bon pa curason tambe.

15. Chuculati scur ta rico na antioxidante, baha colesterol y reduce problemanan cardio vascular.

16. Cilantro ta disminui e riesgonan di obesidad, diabetes, malesanan di curason, cuero, cabey y energia.

17. Cinnamon por ta efectivo contra HIV, mehora e nivel di sucu di esnan diabetes tipo 2, preveni Alzheimer y disminui e proceso di MS (multiple sclerosis).

18. Coffie ta yen di antioxidante, ta preveni Parkinson's, disminui e posibilidad di cancer di higra y promove salud di curason.

19. Cranberries ta tremendo proveedor di vitamina C, fibra y vitamina E. Cranberries ta reduci riesgonan cardiovascular, slow down tumor y salud oral.

RECETA

BLUEBERRY FRENCH TOAST



I n g r e d i e n t e

cooking spray

1 kipashi di bo pan preferi

2 copi di blueberry fresco

8 webo

2 copi lechi

½ copi heavy cream

2 tbsp sucu

½ tsp casca raspa di lamunchi

¼ tsp almond extract

⅛ tsp salo

P r e p a r a c i o n

Pre-calenta fornu na 375°F (190°C). Spray un baki 9x13-inch cu cooking spray. Slice e pan y kita e rand, corta e pan den pidanan chikito. Pone e blueberries entre e pida pan y rond di e pan. Bati e lechi, crema, sucu, casca raspa di lamunchi, webo, almond extract y salo. Basha esaki riba e pan y press pa esaki por absorbe; lag'e keto pa 15 pa 20 minut. Horna esaki pa 45-55 minut, te ora esaki ta crispy y bruin.



The Eighth
Continent, INC.
Import & Export



Arendstraat 103 Oranjestad Aruba P.O. Box 440, Aruba
Tel: (297) 582-1304, Fax: (297) 583-5083
Website: www.tecaruba.com

Diadomingo anochi

Chauffeur burachi y pa colmo agresivo a causa accident riba rotonde



A-11612 a bin di pariba cu velocidad halto, y na un forma violento a bay dal tras di un Nissan Sentra NISMO color blanco cu number A-42818. E impacto a laga full e parti patras di e Nissan destrui.

Como sifuera poco, e chauffeur di e Suzuki SX4 tabata basta burachi of bao influencia di un of otro substancia. El a baha, y a cuminsa busca forma pa start un pelea cu esnan den e Nissan.

Pa casualidad un unidad di Recherche Oranjestad

a pasa, y mesora nan a stop y actua pa stop e intento agresivo aki. E homber a manera purba resisti, pero e oficialnan hudicial na forma tactico a sa di pone boei na su man, y a pone e homber abao na suela pa por keda cu control riba dje.

E oficialnan di Recherche a solicita pa transportwagen di CEA, cu a yega pa asina bay cune. El a wordo hiba warda di polis, unda cu ora e bin bij lo realisa e gasto cu e la hinca su mes aden door di core auto burachi.

Transporte pirata ta cobra 7 florin pa trip y hopi usuario pa paga maske nan ta core ilegal

ORANJESTAD (AAN)—Ta un hecho cu Departamento di Transporte Publico (DTP), no por bringa e situacion di transporte pirata cu ta ofrece servicio den, practicamente, tur distrito.

Nan ta puntra “unda bo ta bay”, cualkier caminda cu un di nan pasa y wak un persona para wardando un bus, y ciertamente nan ta haya cliente, mas ora cu bus of autobus ta tarda. Anto nan ta bisa di biaha cu prijs ta sea 5, 6 of mas tanto 7 florin, kiermen mas caro cu esnan legal, cu tin vergunning y seguro y ta para responsable pa e pasahero.

Number A, nan ta core y nan no tin permiso, no tin vergunning y tampoco ta paga impuesto. E mesun pasahero ta gaña autoridad ora autoridad ta sospecha y ta para e chauffeur pidi su papelnan, anto tur pasahero diripiente ta bira su primo of ruman, un bieu amigo of bisña. Con por

mostra cu no ta asina?


Tin hende ta bisa miho nan ta haci transporte pirata na luga di horta. Pero locual hende no ta pensa ta cu si nan ta haya un accidente (Dios spaar), riba caminda, no tin aseguro pa responde pa e pasahero su e sufri un lesion, y aparentemente, SVb no ta cubri gasto medico ora un hende ta haya accidente como pasahero di un transporte publico “pirata”.

Pero keto bay e transporte pirata tin un mercado cu ta parece solido aki na Aruba, pasobra tambe t’asina cu busnan di Arubus ta core cada ora, y no semper esaki ta coincide cu e necesidad di e pasahero, asina cu esun cu bin prome nan ta subi bay. Busnan chikito den distritonan, por ehemplo di Noord, tin cierto areanan cu nan no ta pasa pasobra semper e trafico ta hopi druk, y nan ta prefera pasa riba rutan diferente pa yega, por ehemplo, Playa.

ORANJESTAD (AAN): Diadomingo anochi den careda di 7:00 pm, un situacion fastioso a socede na e rotonde di Caya Betico Croes y Verlenging De La Sallestraat cu Verbindingsweg na Playa. E momento ey un accident a keda registra net na e rotonde basta druk, mirando cu tabatin hendenan cu a caba di mira Carnaval bayendo cas.

Diripiente un auto sedan Suzuki SX4 color blanco cu number

Ambientoso Jump-Up na e FUNdraising Tent di Kiwanis Club of Palm Beach



ORANJESTAD (AAN): E organiza un evento di musica y jump-up gratis banda di nan Tent, cu a ser yama 'Together We Shine: A Carnival Night'. Esaki tabata Diabierna anochi, y a bay acompaña pa 'N

Fuzion, Steve Andreas, Caribang, y Shine Music.

Y di trempa caba Carnavalistanan a yega pa asina jump y goza den e fiesta aki cu tabata manera un antesala pa e

weekend di Carnaval. El a atrae extra hende na e FUNdraising Tent di Kiwanis, y esaki tur a yuda pasobra tur ganashi ta bay pa instancianan caritativo.

Stichting Musica a haci anuncio

Groove Master a bira Banda di Aña 2025



ORANJESTAD (AAN): Basa riba e criteria di Banda di Aña ('Band of the Year') cu Stichting Musica ta mantene, un cuerpo di hurado distribui riba e rutanan di Carnaval a evalua cua ta e banda cu a contribui mas durante Carnaval 71.

E criteria tabata lo siguiente: E banda mester

a participa na "Aruba Caiso & Soca Monarch su Soca Finals 2025" y/of den "Festival di Tumba 2025". E banda mester a participa entre e siguiente paradanan di Aruba su Carnaval 2025: Parada di Luz na San Nicolas, Lighting Parade Oranjestad, Parada di Jouvert Morning, Parada Grandi di San

Nicolas, y Grand Parade Oranjestad.

Tambe a usa e criteria di e banda cu miho animacion den parada nan, e banda su zonido, presentacion di e banda su trailer den e paradanan. Tambe e banda mester toca e Soca ganador di Aruba Caiso & Soca Monarch, eta "I For Unity" of e Tumba gana-

dor 2025 "Ban Cumi".

Dialuna atardi, Stichting Musica a anuncia cu e Banda di Aña a bira 'Groove Masters'.

Sin duda alguno, Groove Masters a destaca durante di e evaluacion di hurado y como Band of the Year ta gana e suma di 5.000 Florin como premio. Groove Masters a destaca cu un bon calidad di sonido, tremendo animacion cu un repertorio di cancion nobo y clasico

y cu un presentacion cu a impresionar comunidad en general.

E premio pa Band of the Year lo worde entregado durante e Prize Award Event di Stichting Musica. Un pabien ta bay di parti Stichting Musica pa tur banda musical cu a participa na Aruba Caiso & Soca Monarch su Soca Finals 2025 y tambe na e paradanan di Carnaval 71.

Corda cu semper bo tin di laga area rond Hydrant liber



Diahuebs tin charla special pa Dia di Hende Muhe duna pa Ella Tromp-Yarzagaray

ORANJESTAD (AAN): Pa awor tur hende sa cu Dia Internacional di Hende Muher lo ta Diasabra 8 di Maart venidero. Sin embargo DIARIO a compromete cu Grupo 60+ Dinamico Piedra Plat ta bay tin un programa special diahuebs awor 6 di maart 2025 cuminsando 9:00'or di mainta na: Fundacion Centro Famia Piedra Plat. Como invitado nan ta bay tin Sra. Ella Tromp-Yarzagaray pa e ocasion special aki.

Ella lo bay comparti su añanan di experiencia como hende muher cu a ocupa diferente funcionnan den comunidad entre otro: Minister Plenipotenciario, Minister di Financien, Par-



lamentaria y Gobernador Suplente di Aruba.

E esfuersonan cu e hende muher ta haci pa comunidad y su famia hopi biaha no ta wordo balora y aprecia manera mester ta. Cabayeronan tambe ta invita pa bin diahuebs awor y duna un homenahe na e

hende muhernan. Entrada gratis cupo limita.

Grupo 60+ Dinamico Piedra Plat tin un programa varia 2 biaha pa siman riba diamars y diahuebs di 9:30 am pa 11:00 am. E programa ta consisti di fisio terapia, baile terapia, tempo social y educativo. Tur ta tuma luga na Fundacion Centro Famia Piedra Plat.

Nan tin un comishon cu ta traha voluntariamente pa adulto mayor cu ta consisti di: Faritah Luidens, Chantal Ecury, Yolanda Wolter, Adri Berg y Lila Bisslik.

Cualke treat of apoyo pa nos adultonan mayor lo ta altamente aprecia pa e comishon

ORANJESTAD (AAN): Figurabo bo cas ta na candel, y Bomberonan diripiente no por haci uso di un Hydrant pa conecta nan hoos na dje pa haya awa. Y esey ta e motibo cu rond mundo tin prohibicion pa no para bo auto unda cu tin un Hydrant.

E ta conta tambe ora bo ta para un auto bieu, of un auto kibra.

Kizas e momento a yega pa duna e informacion aki den Lesnan pa Rijbewijs na Aruba. Pero hecho ta cu na otro parti Mundo, e ley ta asina estricto, cu ora bo staciona dilanti di Hydrant, e chens ta grandi cu

bo ta haya un boet basta considerable, of nan ta djis kibra bo bentananan di auto pa pasa hoos door di dje pa yega na e Hydrant, y te hasta e chens, cu autoridad ta lanta e vehiculo y bay cune. Mayoria biaha nan ta hibe na un 'scrapyard'.

Aki na Aruba sin embargo, ta parce cu e hendenan no tin consideracion con importante e Hydrant por ta y ta staciona sin preocupacion su dilanti. Pa colmo cu e vehiculo tipo SUV riba e potret, ta uno cu no facilmente por wordo movi, sin en caso mester di Hydrant.

Final di Carnaval 71

Asina a kima Rey Momo pa core cu tur mal rosea riba dje

ORANJESTAD (AAN): Diadomingo anochi mes, despues cu e Parada Grandi di Carnaval 71 a yega na final, tur hende a cana e pida caminda extra pa asina a yega na Harbour Arena.

Esaki ta e lugar unda e gruponan di Carnaval a escoge hunto cu SMAC pa un biaha mas e anochi ey mes kima Rey Momo. Di e forma aki a core cu tur e mal rosea cu tabatin riba dje. Aunke e aña aki no tabatin clapchi suficiente, toch por a mira cu Rey Momo a kima basta rapido ora cu e monarcanan di Carnaval a cende su

pia na candela. Esaki a socede un poco despues di 9'or di anochi.

Asina a marca final di e temporada di Carnaval 71 pa aña 2025. Pasobra ya pa hopi aña caba no ta organiza e ultimo parada di Carnaval riba Diamars anochi mas. Carnaval otro aña: Tuma nota cu Carnaval 72 di otro aña lo bay ta aun mas trempa. Parada Grandi lo bay ta riba Diadomingo 15 di Februari 2026.

Si acaso bo kier sa e fecha di aki dos aña, esta 2027, esey ta aun mas trempa. Esey lo ta Diadomingo 7 di Februari 2027.



SUPER CARD SUPER DEALS



**COMFORT
CLASS**

**Monday
Thursday**

8.00AWG

**Friday
Sunday**

9.00AWG

IMAX

10.00AWG

11.00AWG

VIP

11.00AWG

12.00AWG

**BEST CINEMA AT
THE BEST PRICES!**

Sign up today at any **The Movies** location
and **start enjoying great benefits!**

Lectura na WEB duna na Bomberonan encuanto "substancianan peligroso"



ORANJESTAD (AAN):
Mescos cu ora cu
Bomberonan tin di
atende un Auto Electrico
na candela, of un candela
na un Avion, semper
mester sa di antemano
kico ta e 'substancianan
peligroso' cu bo ta topa
cune den diferente tipo
di candela.

Por ehemplo, si acaso
un Transformator Huis di

coriente ta na candela, ta
bon pa yega y djis basha
awa riba dje of no.

Recientemente un grupo
di Cuerpo di Bombero,
a bay haci un bishita na
WEB Aruba NV, unda
nan a haya un lectura
encuanto "substancianan
peligroso".

E presentacion aki di
'gevaarlijke stoffen' a
wordo ofreci door di



funcionarianan di WEB
Aruba NV, esta Sr. Rock
y tambe Sr. Geerman.
Aki a elabora riba tur
aspecto di peligronan
presente, y si acaso tin
un candela, ta kico cada
Bombero tin di tene
cuenta cune, incluyendo
peligro di inhala huma
cu por ta wordo produci
pa cualkier quimico.

Personal di Cuerpo
di Bombero a keda
satisfecho cu e
presentacion aki, y ta
manda gradici WEB
Aruba NV pa cu esaki.





Noticianan for di Hulanda

Benta di cervez 'sky high' durante un Carnaval na Hulanda cu hopi solo



HULANDA: Na Hulanda tambe a celebra Carnaval grandemente den fin di siman cu a pasa y e bendedornan di cervez tabata hopi contento mes, mirando e cantidad cu a wordo bendi y consumi. Esaki specialmente den parti zuid di Hulanda unda cu e fiesta ta wordo celebra.

Debi na e hecho cu tabata tin hopi

solo e biaha aki, hopi mas cervez a wordo bendi compara cu den otro añanan.

"E trucknan cu tankinan di cervez a keda core bay bin for di nos cervceria na Den Bosch y tabata tin 250 tanki mobil extra di 1000 liter na establecimentonan di horeca", segun Menno van der Vlist di Heineken.

Inflacion na Hulanda a yega 3.8% den luna di februari



HULANDA: Bida diario na Hulanda den luna di Februari a bira mas caro, cu un promedio di 3,8%.

Esaki segun Centraal Bureau voor de Statistiek (CBS), a base di un calculacion rapido.

Cu esey e inflacion na Hulanda den e luna ey tabata mas halto cu e

3,3% di Januari.

Compara cu e luna anterior, e prijsnan pa consumidornan den luna di Februari a aumenta cu 1,1%.

E inflacion den luna di Februari a wordo causa specialmente door di e desaroyo di prijsnan di cuminda, bebida y tabaco.

Atracador a lamenta locual el a haci y a meld na polis despues di casi 10 año



HULANDA: E atraco riba pomp di gasolin den Bellamystraat na Terneuzen cu tuma lugar riba 18 di Januari di 2016 nunca a wordo resolvi, te cu awor.

E homber cu a comete e atraco y e tempo ey a logra horta algun cien euro, a dicidi di meld su mes cerca polis.

Tabata riba un Dialuna anochi cu e atracador di 18 año a comete e acto criminal riba e pomp di gasolin yama PicoBello.

E empleado cu tabata trahando e anochi ey a duna polis e descripcion di e atracador, pero e crimen nunca a wordo resolvi.

E homber cu awor tin 28 año a meld su mes cerca polis, pasobra el a haya demasiado molester di su consenshi, polis a duna di conoce. El a bisa cu e ta lamenta locual el a haci y ta desea di duna bek tambe e placa cu el a horta e tempo ey.

Un fiscal awor ta bay pensa kico pa haci den e caso aki.

Manehador di scoot mobile a muri despues di dal den auto di polis



WINTERSWIJK: Den un accidente entre un auto di polis y un scoot mobile na Winterswijk, e manehador di e scoot mobile a fayece segun polis.

E accidente a sosode riba e caminda providencial N319.

Ainda a purba di reanima e mane-

hador di e scoot mobile, pero el a fayece na e sitio.

Prensa te cu Dialuna atardi ainda no a ricibi informacion riba identidad di e victima.

Polis di Noord-Nederland ta investigando con e accidente por a sosode.

DEPORTE INTERNACIONAL

Astros tin planea pa Altuve hunga mayoria wega den outfield



HOUSTON: Jose Altuve ta bay hunga mas tanto den outfield. Manager di Houston Astros Joe Espada a bisa Dialuna cu e 9 biaha All Star di segunda base, ta bay hunga outfield e temporada aki. “Na e momentonan aki e plan ta pa e hunga mayoria wega den left field, unda cu e dianan riba cual e ta hunga segunda base, Yordan Al-

varez por cuminsa algun wega den left field”, segun Espada, kende a indica cu nan lo fungi tambe como bateador designa. Durante henter su carrera di Liga Menor y Major League, Altuve no a hunga ni 1 inning den putfield. E hungador di 34 aña tin mas cu 15.000 inning hunga na segunda base.

Keeper Ingles a scop delantero y mande hospital



INGLATERRA: Diasabra rond In- glatera a papia cu disgusto riba un accion di Liam Roberts. E keeper di Millwall a wordo expulsado for di e wega contra Crystal Palace den di 8 minuut caba. Motibo ta cu na un manera remarquable el a scop delantero di Crystal Palace Jean-Philippe Mateta. Roberts a bula basta halto, como

si fuera e tabata practica karate y a scol e atacante Frances den su cara. E hungador di Palace a keda asina seriamente herida cu e mester a wordo transporta pa hospital. E chens tey cu e keeper ta bay haya un castigo bastante largo pa locual el a haci.

Dak ta verwacht di ta cla pa hunga prome wega di proximo temporada di Cowboys



DALLAS: Quarterback Dak Prescott tin planea di ta e cla pa hunga e prome wega di proximo temporada di Dallas Cowboys. “Mi no ta bay duna un fecha, pero mi ta bay ta cla pa hunga e prome wega y mi ta bay ta hopi bon prepara”. Mi ta sintimi hopi bon y mi ta haciendo mas y mas.

E ultimo simannan tabata enorme y progresivo pami, segun Prescott. Prescott a cuminsa e prome 8 weganen di Dallas na 2024, prome cu el a scheur su hamstring contra Atlanta Falcons den luna di November. El a haci un operacion na e hamstring, cu a pone cu el a perde resto di temporada.

Probablemente Federico Dimarco no por hunga contra Feyenoord



ITALIA: Tin diferente ekipo den ultimo 16 di Champions League y Europa League cu tin problema di lesion, cu lo stroba den nan weganen cu ta na caminda. Esey ta conta tambe pa Inter Milan, pasobra e chens ta basta grandi cu Federico Dimarco no lo por hunga ningun di e dos weganen

di octavo di final di Champions League contra Feyenoord. E hungador Italiano di defensa di 27 aña tin un lesion na su billdrechi, e lider di Serie A a duna di conoce. E lesion no ta serio, pero e hungador por perde algun wega a consecuencia di esaki.

Noticia Internacional

INTERNACIONAL

NOTICIA FOR DI COLOMBIA

PETRO PIDI CONGRESO PA LEGALIZA MARIHUANA

BOGOTA: President di Colombia, Gustavo Petro a referi na e urgencia pa reforma politica di droga na Colombia,



principalmente REGARDANDO marihuana. Den e sentido aki, el a pidi Congreso Colombiano pa nan legaliza e substancia aki, pasobra e ta adverti cu djis sigui cu su prohibicion lo keda genera mas violencia y fomenta criminalidad na e pais.

"Awendia ta existi cartelnan mas poderoso compara cu e epoca di Pablo Escobar. E empoderamento di e organizacionnan mafioso aki ta muestra e fracaso di prohibicion y di e ausencia di medidanan alternativo pa cu e simple prohibicion," e president a indica. Aki el a agrega: "Mi ta pidi Congreso di Colombia pa legaliza marihuana y saca e cultivo for di violencia. E prohibicion di marihuana na Colombia ta djis trece violencia so." E president a indica cu si su gobierno sigui colabora directamente cu otro paisnan pa confisca cocaina y captura di e principal cabezantenan di e organizacionnan criminal, ta necesario un enfoque mas integral cu ta mik tanto riba consumo y tambe produccion di e substancianan aki. "Mi gobierno lo mantene cu tur Gobiernoan e cooperacion completo pa loke ta confisca cocaina. Y ya a enfoca y lo focus su accion riba contrabandonan grandi y riba e caponan grandi di cocaina como tambe labamento di placa na nivel mundial," el a indica. E mandatario a haci un yamada internacional pa revisa tur regla riba e foyo di coca, cu e meta di permiti su uso den productonan legitimo manera fertilizante y cuminda, como parti di un proceso pa substitui e cultivonan ilegal aki.

AWACERO PISA CU HAGEL A CAY NA CALI

CALI: Awacero pisa acompaña cu hagel (blokinan chikito di ijs) a cay Diabierna atardi na parti zuid y west di Cali. Diferente ciudadano a core pone riba social media, nan video unda bo ta mira hagel ta cay abao riba tera, riba auto, y den cura di nan cas. Algun caminda e yobida tabata fuerte, y den parti cercano di e centro comercial Unicentro un palo grandi mata a cay tambe, strobando un pasio di peaton. Tabatin mas lugar unda palonan grandi mata a cay, y hasta algun area di Cali a keda sin coriente, y tur esey causa pa e awacero pisa.

PAHEHA RIBA BROMMER A DAL DEN BACA Y MURI

RIOHACHA: Un accident tragico a cobra bida di un pareha, kendenan tabata coriendo riba e caminda cu ta conecta Paraguachón cu Maicao na La Guajira. E pareha Francisco Javier Rivera Suárez di 27 año, y Andreina Paola Garcia Palmar di 26 año, tabata moviendo riba un motorcycle ora cu nan a dal contra un baca cu a bay cruza caminda. E accident a socede den zona rural di Maicao. Francisco tabata na stuur y no por a brake ni busca forma pa evita di dal den e animal. Consecuencia ta cu a haya un impacto fuerte, cu a pone nan bay halto y cay banda di caminda. Tur dos a muri eybao mes debi na gravedad di heridanen. E caso a causa hopi tristeza na pueblo di Paraguachón, debi cu e victimanan ta hopi conoci eynan. Francisco ta traha como docente di scol, y Andreina ta labora na diferente trabao. E relato di Polis no a bisa nada kico a socede cu e baca.



Auto a atroya varios persona na Mannheim, Alemania: por lo menos dos morto y varios herido



MANNHEIM: Un otro caso di atroyo multipel na Alemania a tuma lugar, e biaha aki na ciudad di Mannheim, west di e pais. Un auto a dal varios persona, segun informacion di prensa local, y aunke polis local a confirma un morto y varios heridos, e medionan local a informa cu e cifra di morto a subi na dos persona. E incidente a tuma lugar den un mercado di carnaval cu tabatin varios truck di cuminda, como tambe entretenimento.

Autoridadnan ya a identifica e agresor di e atake, cu a wordo deteni: "Ainda nos no por duna informacion riba e cantidad di herido y e gravedad di e heridanen. Den marco di e medidanan di buskeda, cu a cuminsa di inmediato, nos a identifica y detene un sospechoso", autoridadnan local a informa den un comunicado, cu a agrega cu no ta claro ainda si e incidente tabata accidental of delibera.

"Den e momentonan aki tin un operativo policial

den centro di ciudad di Mannheim, den zona di Wasserturm / Plankenkopff", nan a añadi. Ademas, nan a comparti un number di telefon pa esnan cu por a wak loke e pasa, pa yama y conta nan e version di e hechonan.

Autoridadnan di Baden-Württemberg a adverti e poblacion riba un "situacion potencialmente mortal" a traves di e aplicacion di alerta Katwarn y a pidi poblacion evita e centro di ciudad.

Papa Francisco a bolbe sufri dos episodio di insuficiencia respiratorio agudo

VATICANO: Papa Francisco a bolbe sufri dos episodio di insuficiencia respiratorio agudo y mester a wordo conecta na ventilacion mecanico "no invasivo".

"Papa a presenta dos episodio di insuficiencia respiratorio agudo, causa pa un acumulacion di slijm endobronquial y consecuente broncoespasmo", segun e ultimo boletin difundi pa Vaticano.

Nan a agrega cu Papa Francisco ta lucido, pero dokternan ta sigui cu e pronostico reserva, loke ta



nifica cu nan ta considera cu e no ta fuera di peligro. Papa a descansa durante anochi y ta sigui stabiel. Papa a manda un mensahe di gradicimento na e congregacion pa nan oracio-

nan di tur parti di mundo. E ta sinti nan afecto y cercania y, Papa a agrega cu den momentonan aki, "mi ta sinti e sosten di henter Pueblo di Dios".

Noticia Internacional

Lider di grupo criminal na Haiti a menasa cu “consecuencianan sangriento” despues di un operativo policial



PORT-AU-PRINCE: E ex-polis cu a bira un lider di un coalicion di gruponan criminal na Haiti, Jimmy Chérizier -alias Barbecue-, a desmenti den un video e rumornan riba su morto cu a circula den rednan social, despues di un operativo policial den area bao su dominio na Port-au-Prince.

“Nos ta bibo. E gabinete di Prome Minister (haitiano

Alix Didier Fils-Aimé) a publica un nota bisando cu ta trata di un operativo. Señores, tabatin un operativo na Bas de Delmas?”, Barbecue a puntra su hendenan, cu a contesta: “No, hefe”.

Barbecue, den un video cortico, a trece duda den e operativo cu Gobierno supuestamente a realiza un dia prome, pero no a haci referencia na varios di su

tenientenan cu, segun Fils-Aimé, a muri durante e atake di Polis Nacional di Haiti (PNH).

E lider criminal a señala cu despues di e asesinato do presidente haitiano, Jovenel Moise, “cualkier hende por sufri e mesun suerte den e pais”.

“Nan a lansa drones. Mi no tabata sa cu nan tin drones explosivo. Y awo cu mi sa cu nan tin drones explosivo, prepare nan mes. E mesun drones explosivo lo laga nan yora. Nan ta wordo bendi tur caminda”, segun e lider di e grupo criminal.

Rio de Janeiro a bira e enorme escenario di samba durante Carnaval



RIO DE JANEIRO: Scolnan di samba di Rio ta competi pa e gloria den un espectáculo cu ta combina tradicion y modernidad. Tanto local como turistanan a vibra cu inicio di Carnaval, mientras e atencion di e brasileronan tabata dividi entre Carnaval y Oscar, cu nominacion di e pelicula ‘I’m still here’.

E pasarela di e Sambodromo tabata yen di energia y briyo durante e prome anochi di desfile di Carnaval.



E pelicula a gana premio di ‘Miho pelicula internacional’ un obra di e cineasta Walter Salles den e gala di

Hollywood. Esaki tabata e prome Oscar pa e cine nacional.

NOTICIA FOR DI VENEZUELA

DENUNCIA CU 28 BARCO STRANHERO NA GUYANA

CARACAS: Riba Diadomingo, Forza Armada Nacional Bolivariana (FANB) a rechaza e declaracion di e presidente di Republica Cooperativo di Guyana, Irfaan Ali, relaciona cu transito cu Patruyero Oceanico AB Guaiquerí den awanan di e zona delimita. FANB a bisa cu nan a



detecta via imagennan di satelite, e presencia di 28 Boor Toren y Tankeronan stranhero den e zona controversial. Venezuela ta bisa cu e barconan aki tey eyan bao consentimiento di Gobierno di Guyana y violando flagrantemente e Derecho Internacional, ta haciendo trabao di explotacion y comercializacion di petroleo cu tin den tera. Nan ta recorda Guyana cu e disputa ta cay bao instrumento huridico, valido, y vigente, poni na Asamblea General di Nacionnan Uni, y tambe Acuerdo di Ginebra, y pesey Guyana no tin base legal ni legitimidad pa dicidi riba nan mes riba un espacio unda nan no por eherce ni soberania ni jurisdiccion.

POLIS A GARA LADRON DI AIRCO DI 24 MIL BTU

PUNTO FIJO: Polis di estado Falcon a detene Darwin Jesus di 35 aña di edad, net ora cu el a caba di desmantela y horta un split unit airco di 24 mil BTU den sector Nuevo Pueblo na Las Piedras. Tur cos a cuminsa ora cu un Security Guard atento a ripara kico ta pasando, y a rek man y avisa un patruya di Polis cu tin un ladron activo den un negoshi.



Oficialnan a stop y a baha bay check y a drenta e negoshi tambe. Den e negoshi nan a bin topa cu Darwin Jesus, kende ta un persona cu ta biba na La Chinita na municipio Carirubana, cu tin e airco full desmantela. E airco a wordo confisca, y e homber awor ta deteni.

CUATRO MORTO DEN ACCIDENT COLONIA TOVAR

MARACAY: Diabierna siman pasa a registra un accident pisa riba e caminda cu ta bay pa Colonia Tovar, y debi na esaki cuatro persona a perde nan bida, incluyendo un muher na estado, y tambe un mucha muher di 2 aña di edad. Varios persona mas a keda gravemente herida. E



caso a socede atardi pa 4:15 pm, ora cu un SUV grandi Chevrolet Grand Blazer (conoci tambe como GMC Yukon) color blauw a cay di forma violento for di rand di un caminda den sero, y a bay finaliza 300 meter mas abao di e abismo. E famia den e SUV tabata regresando cas bek despues di a pasa un dia na e poblacion turistico di Colonia Tovar. E chauffeur Carlos Jimenez Peña (tambe a fayece), a perde control riba su stuur. Ademas di e chauffeur, den e accident a muri Carla Mirleny Jimenez Salgado di 25 aña y ta na estado, Leidi Maria Salgado Mendoza di 41 aña, y Sofia Antonela Curapiaca Jimenez di 2 aña. Esnan herida ta Donna Salgado di 46 aña, Antony Curapiaca di 27 aña, Darla Salgado di 24 aña, y teenager Emily Jimenez Salgado. Bomberonan a traha hopi pa saca tur hende di eybao.

Awor celebrando nan di 80 aniversario

Asina a tene almuerzo special cu tur ex-President di ATIA



ORANJESTAD (AAN): Recientemente a tuma lugar un reunion memorabel, unda caranan conoci, di personanan cu a traha fuerte pa Asociacion ATIA, a reuni. E tabata uno special, esta un almuerzo organiza pa tur ex-President di ATIA.

Di e forma ey, historia y tradicion a uni ora cu e ex-

Presidentnan a reuni den un almuerzo special pa celebra e di 80 aniversario di ATIA. E tabata un momento pa reconecta, reflexiona, y celebra e legado di liderato cu a forma e Asociacion manera cu e ta awe.

Tabatin basta combersacion, harimento, y contaminato di storianan di retonan, triunfo, y visionnan comparti cu a resona entre e generacionnan di lidernan. Cada sacudimento di man, cada sonrisa, tabata un recordatorio cu liderato no ta djis pa bo tin un titulo, pero pa laga un impacto duradero atras.

Riba combinacion di potret por mira mas di e hecho memorabel aki, unda ATIA ta keda sigui mira pa futuro, guia pa e sabiduria y dedicacion di esnan cu a traha e ruta pa nan.



Pa chika Pos - Habri tuberia y wc. Servicio lihe y confiabel.

Experiencia ta manda

CICLONE
Septic Tank Service

Tel: 564-0607 / 734-0607

TIRA SUSHI AFO

Chapi, verf, corta mata, plumbing, pega tegels, maintenance. Dialuna pa Diadomingo, Whatsapp: 561-1397

CONSTRUCCION REMODELACION

Nos ta traha y drecha tur sorto di dak: shingle, eterniet, panchi, zink. Pega bloki, tegels, plafond, pleister, pone porta, lanta cura, basha vloer, construcccion di cas y apto bon prijs. Free quotation. Tel: 561-2137

TA FURA ELMA UPHOLSTERY

Matras, box busca mainta y haye atardi! Set di sala, tv chair, sienta auto.

Tel: 565-5577

Macapruimstraat # 1L

DIRECTV

A miho T.V. na Aruba, movies, sports, kids, news & more.

Yama awo cel: 733-5762

DirecTV cambia bo vida

SUSHI

Nos ta lanta sushi di cura lage limpi limpi mane un soño. Pa solamente 50,- y Ecotech ta apart. Yama nos na 592-5766 of 561-5179 Arubiano trahado.

ASSOCIATED REALTORS

TERENO PA BENDE? Bo tin pensa di bende bo tereno? Eigendom of erfpacht. Anto laga nos atende cu tur e tramitanan di benta via notario. Yama Mito na 593-6318 pa un presentacion.

ASSOCIATED REALTORS
TA HUUR

Un apartamento espacioso di 2 camber y 1 baño den Pavia Country Club, exclui utilidadnan y pa Afl.1.750,00 pa luna mas un luna borg. Yama Mito na 593-6318

TA BUSCA

Bloemista profesional pa traha na Curaçao. sandramihuerta@gmail.com

FOR SALE

FOR MUSIC COLLECTORS
Coleccionista ta bende su colleccion di longplays, singles, 78, cassettes & CD's, los by choices. Lista di inventario disponible via email. Email "josephr@setarnet.aw" Tel: 597-2155

DIARIO

582-6747

Diahuebs awor tin chens pa explora e mundo di Mond di Mangel



ORANJESTAD (AAN): Ata un chens unico pa pueblo di Aruba, conecta cu naturalesa hunto cu 'Naturalesa ta Papi'.

Si acaso abo ta curioso pa sa mas di nos naturalesa y su rol importante den nos mundo? Introduciendo "Naturalesa ta Papi", un programa nobo presenta pa Aruba Conservation Foundation (ACF), diseña cu e meta di conecta e comunidad di Aruba cu naturalesa a traves di diferente

experiencianan significativo, interactivo, y educativo durante aña.

Como parti di e programa nobo aki, nan ta invita pueblo pa ta parti di nan prome evento yama "Encuentro di Conocemento" (EdC).

Den e promo edicion di EdC, lo explora e mundo fascinante di Mond di Mangel. Bao guia di expertonan, actividadnan interactivo, y interaccionnan educativo, bo lo descubri di con e sistema

ecologico aki ta esencial pa Aruba.

E ta gratis, pero pa participa ta importante pa bo inscribi rapido na e website aki:

www.bit.ly/edcaruba

Esaki lo bay ta Diahuebs 6 di Maart 2025, for di 6:45 pm te cu 8:45 pm, na MFA Savaneta. Bo mester ta 13 aña bay ariba pa participa.

Join e prome parti (di un series di '4') pa siña mas di e naturalesa cu ta sostene pueblo.

Aurora

Royal Pray

Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699

E.: info@aurorafuneralaruba.com

Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu dolor na nos curason pero conforme cu boluntad di Dios nos ta anuncia fayecimento inespera di esposo, tata, welo, ruman, omo y amigo stima

Rudolfo Valentino Hieroms

Miho conoci como pa, papi, opa, Rudy of Joe
*27-06-1961 - †25-02-2025



Su mayoran: †Maria Jacobs y †George Hieroms
Su esposa: Adriana Hieroms-Girigori
Su yuinan: Richelline Hieroms
Anchaella Hieroms
Xyriana Hieroms y Curtis Mathew
Migshallon Hieroms
Giyondrick Hieroms y Joyce Semeleer
Su nieto y nietanan: Radishma, Jayla, Angelly, Alyson, Faizel, Faichaella, C-Riëngelly, Angel, Nathan, Elijah, Israel
Su rumannan:

Jorge
Madeline
Yvonne
Linda
Aida
Roberto

Su cuñanan: sra vda Filomena Kelly y famia
Sra Nilda Ortiz-Girigori y Diaron Ortiz y famia

Su madrina: Caridad

Su padrino: Basilio

Tanta y omonan

Su iha y subrina/an

Primo, primanan y demas famia: Hieroms, Jacobs, Girigori, Richardson, Mathew, Hortega, Kelly, Ras, Echobardo, Martinus, Wester, Quandus, Rodriques, Lewis, Yarzagaray, Caton, Marti, van der Biezen, Tromp, Conquet, Figaroa, Ridderstaat

Nos ta pidi nos disculpa si den nos tristesa nos por a lubida un famia

Ta invita pa asisti na e acto di entiero cu lo tuma lugar dia 5 di maart 2025 di 2pm - 4pm na Aurora funeral home y despues saliendo pa Santana Sabana Basora
Adres y dia di condolencia: Aurora funeral home dia 4 di maart di 7 pa 9 or pm

Nos disculpa si den nos tristeza por a lubida algun famia y conocirnan


Despues di entiero nos NO ta ricibi bishita na cas

"In my father's house are many mansions: if it were not so, I would have told you. I go to prepare a place for you."
John 14:2

OLIVE TREE
FUNERAL CARE & CREMATORY

In loving memory of:

Alphonsus "Fons" Jacques Geerlings
Born Augustus 2, 1930 –
Passed away
21 Februari 2025



His wife:

†Iris Elaine Geerlings-Heath

Left to mourn his loss:


Children: †Phyllis Elaine Maria Mingo-Geerlings
Jennifer Lilian Geerlings
†Joan Helen Geerlings

Grandchildren: Andrew Jason Geerlings
Raquel Iris Mingo
Kimberly Iris M.L. Gerding

Greatgrandchild: Sade Joan Phyllis Mingo
Close friends and family in Aruba, Curaçao, St Maarten, Surinam, Netherlands, USA

Cremation service will be held on March 4th, 2025 at the Olive Tree Funeral Care & Crematory from 9am to 11am in the morning.

Bernhardstraat 134/136 • Tel: 584 8888



Colegio EPI

Directie, Staf y Personal ta extende nan mas sincero condolencia cu fayecimento di nos kerido colega

Sr. Randy Geerman

*16-03-1973 – †25-02-2025

"Randy, nos colega, nos amigo, masha danki di curason pa tur locual cu bo a haci pa nos studiantenan, pa nos enseñansa y specialmente pa bo team di unit H&T. Ta duro pa tuma despedida di un gran colega manera bo."

Nos ta desea tur docente, personal y estudiante di unit Hospitalidad & Turismo hopi forsa den e dianan dificil aki; specialmente na su casa y famia.

Cu nos colega Randy sosega na paz.

Dama turista Aleman a hoga na St. Vincent

KINGSTOWN: Autoridadnan ta investigando e hogamento tragico di Petra Ortlepp, un turista femenino di 58 aña procedente di Alemania. Esaki a socede na Mt. Wynne na isla di St. Vincent & The Grenadines.

Autoridad a bisa cu e dama Ortlepp tabata landa cu su amigonan den e area ey den oranan di merdia, y despues nan a bin haye ta drief boca abao den awa. No obstante esfuertonan di hendenan ey-banda pa trat ana resucita e persona, tur intento tabata envano.

Personal medico a wordo manda eynan, unda nan a constata morto di e turista. Ministerio Publico a dunar ordo pa practica autopsia riba su curpa pa haya sa e causa exacto di morto.



**SIN
WEGA
JUST
GREAT
PRICES.**
ONLY AT AMC UNICON.

**30%
OFF**
SELECTED
PRODUCTS



**75" NOW
AWG 1499**
TCL
4K UHD GOOGLE
SMART TV 75P755A
WAS AWG1829



TCL
50" 4K UHD
SMART TV
50P755A
**NOW
AWG649**
WAS AWG819



TCL
43" 4K HDR
GOOGLE
SMART TV
43P635A
**NOW
AWG499**
WAS AWG679



15.6" DELL
LATITUDE
LAPTOP
L35215TGE
**NOW
AWG1499**
WAS AWG1869



14" HP
LCD DISPLAY
TOUCH SCREEN
14-DY2001LA
**NOW
AWG1449**
WAS AWG1589



13.6" APPLE
MACBOOK AIR
LAPTOP
MRXT3LLA
**NOW
AWG3299**
WAS AWG3799



569-2407
AMC EAGLE MEGASTORE

568-9070
AMC SAN NICOLAAS

HORARIO: 9am - 6pm DIALUNA PA DIASABRA



Aruba un biaha mas a destaca na Rep. Dominicana den Teen Princess International

ORANJESTAD (AAN): Recientemente a tuma lugar na Boca Chica Rep. Dominicana e concurso Teen Princess International na unda cu Aruba tambe tabata presente den representacion di Darienne Lampe.

Darienne a participa aña pasa den Miss Teen Aruba International pero apesar di no a clasifica den e finalistanan, e organizacion a mira den dje potencial internacional y a apunta Darienne pa e concurso Teen Princess organiza door di Sr. William Javier di Casa de Reinas Puerto Rico. Durante e dianan di concentracion Darienne a enfoca riba su concurso y durante e eventonan individual semper tabata destaca.

Den e competencia di Trahe di Baño el a keda na di dos lugar. Den competencia di Trahe Nacional el a keda na di



dos lugar. Den su Show di Talento a keda na 3er lugar. Durante e show final Darienne a luci espectacular di comienso te final y a logra e titulonnan di "Mejor Rostro", "Miss Elegancia", "Aruba Best Team", y "3era Finalista Teen Princess International".

GLW foundation ta masha orguyoso di Darienne y kier a gradici tur persona cu di un of otro forma a yude realiza e biahe aki, Danki na tur esnan cu a coopera cu un sponsorship sea ta prenda of financiero, cu a yuda decora y cu tabata pendiente di Darienne na tur momento.

